

մաքսային կանոնների խախտումներ վերաբերյալ

գործերի վարույթները կարճելու մասին

«25» մայիսի 2023թ

ք. Սիսիան

Ես՝ Հայաստանի Հանրապետության պետական եկամուտների կոմիտեի Հարավային մաքսատուն-վարչության պետ Արտաշես Ղամբարյանս, ուսումնասիրելով ՀՀ քաղաքացի Կարեն Սահակի Սահակյանի (անձնագիր՝ AS0266563, հասցե՝ Արարատի մարզ, գ.Արարատ, Բաֆֆու փողոց, տուն 44/1) կողմից մաքսային կանոնների խախտում կատարելու վերաբերյալ նյութերը,

Պ Ա Ր Զ Ե Ց Ի

2023 թվականի ապրիլի 03-ին թիվ 05100041/310323/0013520 տարանցման հայտարարագրով ՀՀ ներմուծված 32,400 կգ կլինկերը ՀՄՎ-ում կշռվել է, որի արդյունքում պարզվել է, որ 32400 կգ կլինկերից փաստացի առկա է 19280 կգ-ը, հետևաբար 13120 կգ պակաս է:

Նշված փաստի առթիվ թիվ 05100041/310323/0013520 տարանցման հայտարարագրով փոխադրող հանդիսացող ՀՀ քաղաքացի Կարեն Սահակի Սահակյանի նկատմամբ Հայաստանի Հանրապետության պետական եկամուտների կոմիտեի Հարավային մաքսատուն-վարչության ՄԳ բաժնի գլխավոր մաքսային տեսուչի կողմից 03.04.2023 թվականին հարուցվել է մաքսային կանոնների խախտման վերաբերյալ վարույթ՝ «Մաքսային կարգավորման մասին» ՀՀ օրենքի 307-րդ և 308-րդ հոդվածների հատկանիշներով, այն է՝ «Առանց մաքսային մարմնի գրավոր թույլտվության մաքսային հսկողության ներքո գտնվող ապրանքները մաքսային հսկողության գոտուց դուրս բերելը, բեռնելը, բեռնաթափելը, փոխաբեռնելը, փաթեթների վնասվածքները վերացնելը, փաթեթները բացելը, փաթեթավորելը կամ վերափաթեթավորելը /ՄՕ 307-րդ հոդված/, և «Առանց մաքսային մարմնի գրավոր թույլտվության մաքսային հսկողության ներքո գտնվող ապրանքները կամ տրանսպորտային միջոցները մասնակի կամ ամբողջությամբ հանձնելը (բացառությամբ ֆիզիկական անձանց կողմից անձնական օգտագործման տրանսպորտային միջոցները հանձնելու դեպքի), օտարելը, ոչնչացնելը, ինչպես նաև մաքսային հսկողության ներքո գտնվող ապրանքները կորցնելը»:

Վարչական վարույթի շրջանակներում ՀՀ քաղաքացի Կարեն Սահակի Սահակյանը բացատրություն է ներկայացրել առ այն, որ 2023 թվականի մարտի 31-ին ժամը 17:00-ին սահմաններում ԻԻՀ-ից ՀՀ ներմուծված կլինկերը իր կողմից շահագործվող «IVECO» մակնիշի, 37CR364 պետհամարանիշի բեռնատար տրանսպորտային միջոցով տեղափոխելիս Սյունիքի մարզի Վերին Խոտանան գյուղի մոտակայքում կողաշրջվել է /կից ներկայացրել է լուսանկարներ/, որի հետևանքով ապրանքի մի մասը թափվել է, որից հետո առանց մաքսային մարմինների տեղեկացնելու իր ընկեր Հայրիկ Սիմոնյանը իր գիտությամբ տրանսպորտային միջոցը ուղղել է և թափված ապրանքի այն մասը, որ ձորում չի գտնվել բեռնել է «IVECO» մակնիշի, 37CR364 պետհամարանիշի բեռնատարում:

ՀՀ քաղաքացի Կարեն Սահակյանը բուժօգնություն ստանալու նպատակով տեղափոխվել է Կապանի բժշկական կենտրոն, որտեղ նրան մոտեցել և ալկոհոլ օգտագործած /կամ չօգտագործած/ լինելը ստուգել են Ճանապարհային ոստիկանության աշխատակիցները:

ՀՀ քաղաքացի Կարեն Սահակի Սահակյանի բացատրությունում մատնանշված հանգամանքների իսկությունը պարզելու նպատակով հարցումներ են կատարվել «Կապանի բժշկական կենտրոն» ՓԲԸ-ին և ՀՀ Ներքին գործերի նախարարության ոստիկանության Սյունիքի մարզային վարչությանը:

Ի պատասխան հարցման՝ «Կապանի բժշկական կենտրոն» ՓԲԸ-ն տեղեկատվություն է տրամադրել առ այն, որ 31.03.2023 թվականին իրենց մոտ է տեղափոխվել ՀՀ քաղաքացի Կարեն Սահակի Սահակյանը (ծնված՝ 28.01.1982թ-ին): Հետազոտության արդյունքում իր մոտ ախտորոշվել է «աջ բազկի բազկային հոդախախտ, գլխիկի կոտրվածք», կատարվել է ներհոդային ցավազրկում, հոդախախտի ձեռքային միամոմենտ ուղղում, դեզոյի կապով անշարժացում և հիվանդը չի հոսպիտալացվել:

Ի պատասխան հարցման՝ ՀՀ Ներքին գործերի նախարարության ոստիկանության Սյունիքի մարզային վարչությունը տեղեկատվություն է տրամադրել առ այն, որ 31.03.2023 թվականին՝ ժամը 21:20-ին «Կապանի բժշկական կենտրոն» ՓԲԸ-ից ոստիկանության Կապանի բաժին ահազանգ է ստացվել, որ ճանապարհատրանսպորտային պատահարի հետևանքով «աջ բազկի բազկային հոդախախտ, գլխիկի կոտրվածք» ախտորոշմամբ իրենց մոտ է տեղափոխվել Կարեն Սահակի Սահակյանը: «Կապանի բժշկական կենտրոն» ՓԲԸ ժամանած Կապանի բաժնի օպերատիվ խումբը և ՃՈ կարգախումբը պարզել է, որ 2023 թ-

ին ժամը 17:00-ի սահմաններում Կարեն Սահակի Սահակյանը վարելով «IVECO» մակնիշի, 37CR364 պետհամարանիշի բեռնատար տրանսպորտային միջոցը, Կապան քաղաքի Վերին Խոտանան բնակավայրի ավտոճանապարհին դուրս է եկել երթևեկելի գոտուց և կողաշրջվել, ինչի հետևանքով վերջինս ստացած մարմնական վնասվածքներով տեղափոխվել է «Կապանի բժշկական կենտրոն» ՓԲԸ: Նույն օրը ճանապարհատրանսպորտային պատահարի վերաբերյալ փաստաթղթերը ՀՀ Ներքին գործերի նախարարության ոստիկանության Սյունիքի մարզային վարչությունից թիվ 77/9-1526 գրությամբ ուղարկվել է ՀՀ Քննչական կոմիտեի Սյունիքի մարզային քննչական վարչություն՝ քրեական վարույթ նախաձեռնելու հարցը լուծելու համար:

Վարչական վարույթի շրջանակներում հարցում է կատարվել ՀՀ Քննչական կոմիտեի Սյունիքի մարզային քննչական վարչություն՝ այս գործով քրեական վարույթ նախաձեռնվելու մասին տեղեկություն ստանալու նպատակով: Ի պատասխան հարցման՝ ՀՀ Քննչական կոմիտեի Սյունիքի մարզային քննչական վարչությունից հայտնել են, որ այս գործով քրեական վարույթ չի նախաձեռնվել:

«Մաքսային կարգավորման մասին» ՀՀ օրենքի 301-րդ հոդվածի համաձայն՝ «Մաքսային կանոնների խախտում է համարվում անձի կատարած անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության պետական սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության»:

«Մաքսային կարգավորման մասին» ՀՀ օրենքի 307-րդ հոդվածի 1-ին մասի համաձայն՝ «Առանց մաքսային մարմնի գրավոր թույլտվության մաքսային հսկողության ներքո գտնվող ապրանքները մաքսային հսկողության գոտուց դուրս բերելը, բեռնելը, բեռնաթափելը, փոխաբեռնելը, փաթեթների վնասվածքները վերացնելը, փաթեթները բացելը, փաթեթավորելը կամ վերափաթեթավորելը՝ առաջացնում է տուգանք՝ այդ ապրանքների մաքսային արժեքի քսան տոկոսի չափով, բայց ոչ պակաս, քան մեկ միլիոն դրամի չափով»:

«Մաքսային կարգավորման մասին» ՀՀ օրենքի 308-րդ հոդվածի 1-ին մասի համաձայն՝ «Առանց մաքսային մարմնի գրավոր թույլտվության մաքսային հսկողության ներքո գտնվող ապրանքները կամ տրանսպորտային միջոցները մասնակի կամ ամբողջությամբ հանձնելը (բացառությամբ ֆիզիկական անձանց կողմից անձնական օգտագործման տրանսպորտային միջոցները հանձնելու դեպքի), օտարելը, ոչնչացնելը, ինչպես նաև մաքսային հսկողության ներքո գտնվող ապրանքները կորցնելը՝ **առաջացնում է տուգանք՝ այդ ապրանքների և տրանսպորտային միջոցների մաքսային արժեքի երեսուն տոկոսի չափով**»:

ԵՏՄ մաքսային օրենսգրքի 2-րդ հոդվածի 1-ին մասի 1-ին կետի համաձայն՝ «վթար»՝ մաքսային հսկողության տակ գտնվող տրանսպորտային միջոցների և (կամ) այլ ապրանքների հետ տեղի ունեցած՝ իր հետևանքներով վնասաբեր տեխնիկական, տեխնոլոգիական կամ այլ բնույթի պատահար, որը հանգեցրել է այդ ապրանքների՝ մաքսային կարգավորման ոլորտի միջազգային պայմանագրերով ու ակտերով չնախատեսված քանակական և (կամ) որակական փոփոխությունների, որոնք չեն առաջացել սեփականատիրոջ և (կամ) այն անձի դիտավորյալ գործողությունների հետևանքով, որի տիրապետության տակ գտնվել են ապրանքները՝ այդ փոփոխությունների պահին, բացառությամբ փոխադրման (տրանսպորտային փոխադրման) և (կամ) պահպանման բնականոն պայմաններում բնական փոփոխությունների, ինչպես նաև անհաղթահարելի ուժի հետևանքով առաջացած փոփոխությունների:

Վարչական վարույթի նյութերի ուսումնասիրությունից պարզվում է, որ ՀՀ քաղաքացի Կարեն Սահակի Սահակյանի արարքում մեղք առկա չէ, քանի որ ըստ էության վթարն անհաղթահարելի ուժ է, որը քաղաքացին չէր կարող կառավարել և վերահսկել, դրանով իսկ կանխելով իր կողմից իրավախախտումների կատարումը:

Ելնելով վերոգրյալից և ղեկավարվելով «Վարչական իրավախախտումների վերաբերյալ» ՀՀ օրենսգրքի 247-րդ հոդվածի 1-ին մասի 1-ին կետով,

Ո Ր Ո Շ Ե Ց Ի

1. ՀՀ քաղաքացի Կարեն Սահակի Սահակյանի նկատմամբ «Մաքսային կարգավորման մասին» ՀՀ օրենքի 307-րդ և 308-րդ հոդվածներով սկսված վարույթները կարճել:
2. Որոշման մասին հայտնել քաղաքացի Կարեն Սահակի Սահակյանին:

3. «Մաքսային կարգավորման մասին» ՀՀ օրենքի 334-րդ հոդվածի 2-րդ մասի համաձայն որոշումն ուժի մեջ է մտնում այն կայացնելու պահից:

ՀԱՐԱՎԱՅԻՆ ՄԱՔՍԱՏՈՒՆ-ՎԱՐՉՈՒԹՅԱՆ ՊԵՏ
ՄԾ ԳՆԴԱՊԵՏ

ԱՐՏԱՇԵՍ ՂԱՄԲԱՐՅԱՆ

